

1 SAN PEDRO

Pedro Toyase'e Si'a Hue'ña Hua Saisicohua'ina

¹ Yë'ë Pedropi Jesucristo jëjo daoquëpi iye toya ja'hua toyayë, yequë pai yejañare hua saisicohua'ina caquë toyayë: Ponto, Galacia, Capadocia, Asia cui'ne Bitinia pa'icohua'ina.

² Maija'quëpi mësarute sahuapi. Sahuasico-hua'ini Maija'quë joyopi Maija'quë tsecohua'ire nepi, mësarupi Jesucristo cuañeñe de'oye sehuocohua'ipi i tsiepi tsoa tosicohua'i pa'ijajë caquë. Jaje pa'ina, Maija'quëpi de'oye ñacaina, jo'cua de'oye pa'ijë'ë.

Ti Pani Huesëyere Utejë Pa'iye

³ De'oquëre pa'ni cañu'u, Maija'quëre mai Ëjaë Jesucristo pëca ja'quëre, maire ai oi do'ire tijupë coasicohua'ire nesiquëre Jesucristo juni huëisi do'ipi. Jaje pa'ina, iye yo'osi do'ipi de'oyere pare utejë pa'i'yere payë, mai.

⁴ Jaje pa'ina, Maija'quë mësarute caquë ma'tëmo de'huacaisi co'amañare ti ne huesë ma'ñere, si'si ne ma'ñere, cui'ne ti me'me tome ma'ñere paja'cohua'i a'ë, mësarui Maija'quë cuasa do'ipi.

⁵ Jaje pa'ina, mësarute Maija'quëpi i tutupi ñacai pa'iji, mësarupi huasosicohua'i pa'i'yere, i ne de'huacaise'ere ti'ajajë caquë. Jare tëji mu'señarepa paja'cohua'i a'ë.

⁶ Ja do'ire mësarui ai sihuajë pa'i'yë, coa nëhui tëcahuë jaiye neñañe ai yo'oye pa'itoje.

7 Jaje pa'ina, mäsaru Maija'quë pa'iji cuasayere ai yo'oyepi neñaquëna, do'i quë'ye etase'epi, toapi neñasi oro do'iyë jerepa seña maca do'i quë'ye etasipi. Oro cato coa carajaiñe a'ë. Neñañe pa'ina, itire pase'e etase'epi Jesucristore iñosi maca Jesucristore sihuajë de'oquëre pa'ni cayere cui'ne ëjaëre pa'ni cayere iñoñe pasipi.

8 Jesucristore ñama'pë pa'isicohua'ita'a ite ai oiyë, mäsaru. Itë ñama'pë pa'isicohua'ita'a pa'ire paji cuasajë ai de'oyerepa sihuayë, yë'opi ca tì'añe peoyerepa.

9 Sihuajë joñoa huaso cuañoñere tì'asi'i cajë tì'ahuë, mäsaru pa'ire paji cuasa do'ipi.

10 Maija'quëre quëacaicohua'ipi ai tsoe hue'ña mäsarute Maija'quë oi coa isi ja'ñere huaso cocare toyacaijëta'a huesëhuë. Jaje pa'ina, iquere caquë'ni cuasajë ai co'ehuë, asa tì'añu'u cajë.

11 Cristo joyopi Maija'quëre quëacaicohua'ire du'ru quëapi, Cristo ai yo'o ja'ñere cui'ne jeteyol'je i ayere ma'tëmo ayere de'oyerepa pa'i ja'ñere quëapi. Jaje quëaquëna, asajë ¿jequë pa'ija'quë a'ni, i? cui'ne ¿je yëhua jaje pa'ija'coa'ni? cajë ai co'ehuë, asañu'u cajë.

12 Jaje co'ejëna, Maija'quëpi iohua'ire quëapi, iye mäsaru quëaye mäsaru tse peoji caquë. Yecohua'i tse a'ë caquë quëapi. Ja cato maini capi. Yure jaje pa'ina, iyere Maija'quë huaso cocare mäsarute quëacohua'i quëahuë, ma'tëmo jëjo daosi joyo tutupi yo'oquëna. Iye huaso coca cato huiñaohua'ique ai cuasajë itise'e ña ëa ju'iñë.

Maija'quëpi Maire De'ocohua'irepa Pa'iyena Soiye

13 Jaje pa'iyē sēte mēsaru cuasayere ne de'huajē'ē, cuepese'eje pa'iohua'i pa'ima'pē. Jaje pa'ijēna, mēsaruna Jesús ayere iño maca, Maija'quē oi cocaiyepi pa'iji, mēsarute. Jare cuasajē pa'ijē'ē.

14 Jaje pa'ina, Maija'quē caye de'oye sehuocai mamajē sēte, Maija'quēre asama'nē yējē pa'ise'ere pa'ima'pē pa'ijē'ē.

15 Maija'quē mēsarute soisiquē ai de'oquē api. Jaje pa'ina, mēsaruje de'ocohua'irepa pa'ijē'ē, ije pa'iohua'i.

16 Jaje pa'ina, toyase'e caji: “De'ocohua'irepa pa'ijē'ē, yē'ēje pa'iohua'irepa.”

17 Mēsarupi Maija'quēre “Ja'quē” cajē secohua'i pani si'anē ini ca'rajē pa'ijē'ē, iye yeja mēsaru pa'i mu'seña pai ñape yo'ose'eje pa'ye saiquēni, cui'ne si'a yē'quē maca si'aohua'ire yo'oquēni.

18 Mēsarute Maija'quēpi huasopi, mēsaru aiohua'i pa'ise'eje pa'ye mēsaruje do'i peoyere yo'ojē pa'isicohua'ini. Mēsarute huasoni saicaima'ē paji'i, oropi panita'a curipi, ne huesēyere. Iye huaso do'i cato saipi, ti ne huesē ma'ñere papi. Jare mēsarupi tsoe asacohua'i a'ē.

19 Cristo tsie do'ipi saicaji'i, mēsarute yēi ñama a'si peoquēpi, si'si te'ñaje peoquēje pa'ire papi.

20 Cristo cato ja yē'ta'a yeja de'huama'nē jaje jucacaija'quēre ca nēosiquē pa'iji. Jaje pa'ipi yure tēji mu'seña mēsaru de'oye pa'iyere caquē daji'i.

21 Jaje pa'ina, mēsaru Cristo do'ija'a Maija'quēre ire papi cuasajē sehuoyē, ju'isiquēni huajēquēre huēoni de'oquēre pare iñosiquēre. Jaje pa'ina, yure mēsaru Maija'quē pa'ire paji cuasajē ina quēco pajē pa'iyē, cocaija'quē api cuasajē.

22 Nuñerepa cocare mäsaru sehuocai do'ire mäsaru joñoa tsoa tohuë, Maija'quë do'ijëre nuñerepa oñu'u cajë. Jajë pa'iyë sëte si'a tuturepa pai ñape yecohua'ire oiye pa'iji, de'o joyore papi.

23 Jajë pa'ina, mäsaru cato yure pai ju'icohua'i mamajë peoyë. Mäsaru cato yure Maija'quë coca ti pani huesëyere papi jocosicohua'i a'ë.

24 Jajë pa'ina, toyase'e caji:

Si'a pai iye yeja pa'icohua'i tayajë pa'iohua'i a'ë,
Si'aye iohua'i pa'iyepi taya jorojë pa'ye a'ë.

Taya cato cuñecoa. Cuñe huesëcona, iti joropi tomecoa.

25 Jajë pa'iquëta'are Maija'quë coca cato ti pani huesëye a'ë.

Iye huaso cocare mäsarute quëahuë.

2

1 Jajë pa'iyë sëte si'aye co'ayere jëcojë'ë, si'aye cosoyere, coa cayere, yecohua'i payere ëa ñañere, cui'ne yecohua'ire co'a coca cayere jëcojë'ë.

2 Jëoconi tsì mañaja'a cõasicohua'i oje yëyejë pa'ye mäsaruje joyo pa'i cocare yëjë'ë, huasosicohua'i ai de'oyere cajë.

3 Mäsarupi Ëjaë de'oquërepa pa'iyere nuñerepa ña ti'asicohua'i pani jajë yëcohua'i pa'ijë'ë.

Cristo Api, Pa'iyë Quë'i Quëna Pë

4 Ëjaëna tsio daijë'ë, pa'iyë pa'i quëna pëna, pai jëocosicona. Jajë pa'iquëta'are Maija'quëre cato i sahuasi quëna përe pa'ë, jai do'i quë'io.

5 Jajë pa'ina, mäsaru ina tsiojaijë pa'iyë quë'i quëna pëa de'ohuë. De'orena, Maija'quëpi joyo huë'e de'huapi, mäsarupi. De'huaëna, ise'ere

necaija'cohua'i pa'iyë. Pa'ijë Jesucristo do'ija'a ai yo'ojë isiyë, Maija'quë sihuaquë ñañere.

⁶ Jaje pa'ina, toyase'e caji:

Yë'ë sahuasicore pani, de'o quëna përe pare Siónna oañë,

Iona quëco paquë cato coa quëco tayohuë caquë co'a ju'iñe pasipi.

⁷ Jaje pa'ina, ja quëna përe iore pao cajë asacohua'ire cato do'i quë'iorepa asa cuañoji. Jaje pa'iquëta'are, toyase'e cayeje pa'ye pa'iji, jaje asama'cohua'ire cato. Jaje pa'ina, caji, toyase'e ñeje:

Huë'e necohua'i jeocosi quëna pëpi

Yure cato si'a huë'e naupa quëna përepa de'o.

⁸ Cui'ne yecopi caji, ñeje:

Asama'cohua'ipi ja quëna pëna ju'ajëna, iopi ne taoja'coa.

Jaje pa'ina, jaohua'i cato Maija'quë coca sehuoma' do'ire ne huesëja'cohua'i a'ë, i ña nëose'eje pa'ye.

Maija'quë Pai Pa'ie

⁹ Mësarü cato i sahuasi pai a'ë. Ëjaëre pase'ere necaija'a pai a'ë. Si'si peo daripë acohua'i a'ë. Maija'quë tsecohua'ire pa'ë. Jaje mësarü pa'iohua'i a'ë. Jaje pa'ina, mësarute nea hue'ñare pa'ijëna, Maija'quëpi soipi, mia hue'ñana etani Maija'quë de'oyerepa yo'ose'ere yecohua'ina quëajajë caquë.

¹⁰ Ja'në cato mësarü i pai peocohua'i paë'ë. Pa'isicohua'ipi yure cato i pai de'ohuë. Ja'në mësarute Maija'quë teaye ñani cöcayie papi. Yure cato mësarute teaye ñaquë oi cöcayji.

Maija'quëre Necayere Cajë Pa'ijë'ë

11 Maija'quë do'ijë, mësarute señë, mësarü capë yëyere sa'ro nëocaima'pë pa'ijë'ë caquë, mai joñoa sañope uihuayere. Mësarü cato iye yeja acohua'i peoyë. Coa daisicohua'i a'ë.

12 Jaje pa'ina, de'oyerepa yo'ojë pa'ijë'ë, si'aohua'ire judío pa'i peocohua'ireje. Jaje mësarupi pa'ijëna, yure mësarute sañope co'aye yo'ocohua'i a'ë casicohua'ipi mësarü de'oye yo'oyere ñani, Maija'quëre de'oquëre papi caja'cohua'i a'ë, iohua'ire Maija'quë huaso mu'se ti'aëna.

13-14 De'oji. Maija'quëpi nepi, pa'i ëjaohua'ire co'aye yo'ocohua'ire si'seja'cohua'ire, de'oye yo'ocohua'ini de'ocohua'i a'ë caja'cohua'ire. Jaje pa'ina, mai Ëjaëre oi do'ire si'a pa'i ëjaëre si'aohua'i jerepa pa'ire sëte de'oye sehuocaiye pa'iji. Jaje cui'ne si'aohua'ire iye yeja pa'i ëjaohua'ire de'oye sehuocaiye pa'iji.

15 Jaje pa'ina, Maija'quë cato yëji, mësarupi de'oye yo'ojë pa'ijëna, huesëohua'ipi ta'ñe cuasama'cohua'ipi mësarute sañope ca ti'añe peoyere.

16 Jo'ya nesicohua'i peoyë, mësarü. Jaje pa'ina, jo'ya nesicohua'i peoyë cajë co'ayere neñu'u cajë yo'oma'pë pa'ijë'ë. Coa ai jerepa Diusu jo'yaohua'i a'ë cuasajë, i yëyere yo'ojë pa'ijë'ë.

17 Si'aohua'ire pa'ire de'oye yo'ojë'ë, ëjaohua'ire yo'oyeje pa'ye. Maija'quë do'ijëre oijë'ë. Maija'quëre ca'rajë'ë. Pa'i ëjaëreje de'oye yo'ojë'ë, ëjaëre papi cuasajë.

Cristo Mai Yo'o Ja'ñere Iñoquë Ai Yo'opi

18 Co'amaña necaicohua'i, mäsaru ëjaohua'ire de'oye sehuocaijê pa'ijê'ë. De'ocohua'ise'ere mäsarute oicohua'ise'ere de'oye yo'oma'pê pa'ijê'ë. Co'a ëjaohua'irejê de'oye sehuojê yo'ojê'ë.

19 Jaje pa'ina, de'oye a'ë, mäsaru de'oye yo'ojêta'are mäsarute yecohua'ipi co'aye yo'ojêna, ai yo'oyere quëcoye.

20 Jaje pa'iquêta'are mäsarupi co'aye yo'ojê si'se cuãnojê quëcoto do'i peoji. Jaje pa'iquêta'are mäsaru de'oye yo'o do'ire ai yo'ojê quëcoye pani de'oye a'ë. Do'i pa'iji, Maija'quë ña hue'ña.

21 Jare caquë mäsarute Diosu soipi, mäsarupi Cristo mäsaru do'ire ai yo'ose'ere ñani i yo'ose'eje pa'ye mäsaruje yo'ojajê caquë.

22 Cristo cato ti te'oreje tayo neñe paquë paji'i, cui'ne pairejê cosoma'quë paji'i.

23 Ite co'aye catojê sañope cui'ne co'ayepi cama'quë paji'i. A'si ite yo'o macajê sañope icohua'ire saisi'i cama'quë paji'i. Coa ai jerepa Maija'quëna jeopi, jaëpi pai yo'oyere ña de'huaquëpi, nuñerepa yo'oquëpi ña de'huajaquë caquë.

24 Cristopi si'aye mai co'aye yo'oye hue'oni sani cruzuna que cuãnopi, maipi co'aye yo'oyere ju'isicohua'ije pa'ye pa'ijê nuñerepa yo'oyere huajêcohua'i pa'ijajê caquë. I a'si do'ipi mäsaru huasosicohua'i pa'iyê.

25 Ja'nê mäsaru yêi ñama ne huesësicohua'ije pa'iohua'ipi pa'ë. Jaje pa'isicohua'ita'a yure cato Cristona co'irena, ipi yêi ñamare ñacaiquë ñañeje ñaquë mäsaru joñoajê ñacaiji.

3

Huejasicohua'i Pa'iyere Quëaye

1-2 Nomiohua'i, mësaruje mësaru ëjëohua'i cuañeñere de'oye sehuojë pa'ijë'ë. Jaje yo'ojëna, mësaru ëjëohua'i sehuoma'cohua'ipi mësaru iohua'ire de'oye ëjaohua'ire ñajë de'oye pa'iyere ñajë sehuoja'cohua'i a'ë, ai yëhuo coca peoye.

3 Mësaru de'ocohua'i ña cuañoñere ëmëje'e capë ëja de'oyere oima'pë pa'ijë'ë, ai de'oye naña yoyere, jai do'i yi'yo se'huoñere, panita'a jai do'i caña suñañere.

4 Mësaru de'ocohua'i pa'iyë cato pa'ijaquë mësaru joyopi de'oye cuasayepi, ja'ë tënë ma'ñerepa, a'ji joyopi jo'cua de'oye pa'iyë a'ë, do'i quë'yerepa Maija'quë ña hue'ña.

5 Ai tsoe hue'ña nomiohua'i Maija'quëna iohua'i pa'iyë isisicohua'i cato jaje pa'iyepi ëja de'osicohua'i pa'ahuë'ë. Maija'quëna quëco pacohua'i pa'ahuë'ë. Jaohua'i cato, jaje pa'iohua'ipi iohua'i ëjëohua'ire de'oye sehuocohua'i pa'ahuë'ë.

6 Jaje pa'io pa'aco'ë, Zara. Jaje pa'iopi io paquë Abrahamre de'oye sehuoco pacopi ca'aco'ë, "Yë'ë ëjaë". Jaje pa'ina, mësarupi ti ca'rama'pë de'oye yo'ocohua'i pani io mamajë pa'iyë.

7 Jaje cui'ne mësaruje ëjëohua'ije mësaru nëjohua'i yëjë cayere de'oye asacohua'i pa'ijë'ë. Pani nomiohua'ipi esa jë'ye duruhuëje pa'iohua'i pa'i do'ire iohua'ire ëjaohua'ire ñajë dahuëre paye. Coa ai jerepa Maija'quë oi mësarute pa'iyë isise'ëje pa'ye jaohua'ireje isisi do'ire mësaru de'oye ñajë pajë'ë.

Jaje yo'ojëna, mësarute josa ta'tëpoje pa'io pa'iye pasipi, Maija'quëre se maca.

De'oyere Pare Yo'o Do'ire Ai Yo'ocohua'i Pa'iye

⁸ Jaje pa'ito pai ñape sa'ñe de'oye yo'ojë pa'ijë'ë, te'e nëiñena tsiosicohua'ipi sa'ñe Maija'quë do'ijëre oijë. Teaye pa'iohua'ipi de'oye yecohua'ire oijë cocaicohua'ipa'ijë'ë.

⁹ Mësarute co'aye yo'ouna, iteje co'ayepi saïma'cohua'ipa'ijë'ë, pëi tea ju'iquëna. Iteje pëijë sañope tea ju'iñepi saïma'pë pa'ijë'ë. Coa ai jerepa mësarute sañope cacohua'ini de'oyepi cacaijë'ë, Maija'quëpi de'oye pa'iyena de'huaja'cohua'ini soisicohua'isëte.

¹⁰ Jaje pa'ina:

Paipi sihuaquë de'o mu'seña pasi'icani
I tsemeñore nau nëcoye pa'iji,
Coso coca caye paja'core yë'opopi.

¹¹ Co'aye yo'oyere jëoconi de'oyere yo'ojë pa'ijë'ë. Jo'cua de'oye pa'iyere co'eni tï'ani jare yo'oye pa'iji.

¹² Èjaëpi nuiñe pa'icohua'ire ñacai paji.
Cui'ne iohua'ite señeje asacai pa'iji.
Jaje pa'iquëta'are co'aye yo'ocohua'ire cato sañope yo'oquë pa'iji.

¹³ ¿Nepi mësarute sañope yo'oja'cohua'ia'ni, mësarupi si'anë de'oyese'e yo'ocohua'ipa'ito?

¹⁴ Jaje pa'iquëta'are mësaru nuñerepa yo'ojë pa'ido'ire ai yo'oni sihuacohua'ipa'ija'cohua'ia'ë. Ca'rama'pë pa'ijë'ë. Cui'ne co'a ju'ima'pë pa'ijë'ë.

¹⁵ Coa ai jerepa Cristore mësaru joñoa Èjaëre pare pajë'ë. Jaje pa'ina, si'anë cuañesicohua'ipi pa'ijë'ë, mësaru sehuoni utejë pa'iyere paipi seni asañu'u

cajè secohua'ire, dahuëre pa'iohua'ipi, ëjaohua'ire ñajè de'oyere papi iohua'i sese'ere sehuocaijè'ë.

16 Jaje pa'ina, mësarü cuasayepi jo'cua pa'ijaquë cani de'oye yo'ojè pa'ijè'ë. Pa'ijëna, mësarü nuñe Cristore sehuocohua'i ëaye pa'iyere co'aye cahua'ipi iohua'i co'aye case'ere cuasajè co'a ju'ija'cohua'i a'ë.

17 Ai jerepa de'oji, nuñere pare yo'ojè ai yo'oye pa'ito. Jaje Maija'quëpi yë nëoru. Co'ayere yo'o do'ire ai yo'oye cato do'i peoye a'ë.

18 Mai co'aye yo'o do'ire saicai Cristo ai yo'opi, te'ore pare juni tējiquë. De'oquëpi ai yo'opi, mai co'acohua'i do'ire, maini Maija'quë quë'rona sasi'i caquë. I capè cato huahuoni ju'isiquë paji'i. Jaje pa'isiquëta'a i joyopi huëoquëna, cui'naëpi huajëquë pani copi.

19 Ja joyopi sani paire necaise'ere quëapi, tseä cuañosi joñoare.

20 Ja joñoa cato tsoe huëña Noé pa'inë Maija'quëre sehuocaima'cohua'i pa'ijë pa'isicohua'i paë'ë. Jai yohuë de'hua maca Maija'quë yo'o jujama'ë iohua'ire utequë pa'i maca ja joñoare quëapi. Coa ocho pai maña huaso cuañojè pa'ahuë'ë, ocopi.

21 Maire oco doye cato ocho paire huasose'eje pa'ye a'ë. Jaje pa'ina, Jesucristo juni huëisi do'ipi maire huasoji. Oco doye cato coa iñoñe a'ë, ja huasosicohua'i pa'iyere. Jaje pa'ina, ëmëje'e si'sire tsoa toñere oco doye iñoñe paji. Coa ai jerepa de'oye cuasayere pañu'u cajè Maija'quëre señere iñoji.

22 Maire huasoquë cato ma'tëmona mëni Maija'quë ëja te'tere pa'iji, si'aohua'ire

huiñaohua'ire cui'ne cuañe tutu pacohua'ire meñe
cuañequëpi.

4

Diusu İsisı Tutu Pa'ıye Ja'ye Nñacajë Pa'ıye

1-2 Cristopi i capë ai yo'oquë juji'i. Jaje pa'ina, iye cuasayere pajë'ë. Capëpi ju'isiquë cato co'aye yo'oye tēni saisiquë api. Tēni saisiquëpi si'a i iye yeja pa'i maca Maija'quë yēyere yo'oquë pasipi, i capë co'aye yēyere yo'oma'ë, jare cuasajë pa'ijë'ë.

3 Teape tsoe mēsaru Maija'quere sehuoma'cohua'i yo'oyere yo'ojë paë'ë, si'aye yo'oyena sēo measicohua'ipi, co'ayere yēyere, cuepeyere, jai pai tsi'sini aijë ai pisiye yo'ojë cayere, jaiye cōno ucuyere, cui'ne Maija'quë api cajë co'ayere sejë yo'ojë paë'ë.

4 Jaohua'i cato yure mēsarute tıohua'ire ñañë, mēsarupi te'e iohua'i ja're cōni co'ayere yo'ojë pa'ima'pëna. Jaje pa'ina, mēsarute co'aye cayë.

5 Jaje pa'iquëta'are jaohua'i cato iohua'i pai ñape yo'ose'ere iñoja'cohua'i a'ë, huajëcohua'ire cui'ne ju'isicohua'ire pai ñape yo'ose'ere saisi'i caquë ña de'huaquëna.

6 Jaje pa'ina, ju'isicohua'ire de'o cocare quëapi. Ja cocapi iohua'i huajëcohua'i pa'inë yo'ose'ere ña de'huayere caquë, iohua'i Diusu pa'ıye İsiyepi joyopi pa'ijajë caquë yo'opi.

7 Si'a co'amaña carajai mu'seña ti'aji. Jaje pa'ina, mēsaru nuñerepa pa'iohua'ipi Maija'quere señese'e yo'ojë pa'ijë'ë.

⁸ Jaje pa'ina, si'aye jerepa paí ñape sa'ñe oiyere pajë'ë. Paíre oiye cato jaiye co'aye yo'oyere saí de'huacaiye a'ë.

⁹ Paí ñape yecohua'ire de'oye yo'ojë'ë, mësaru huë'ena daicohua'ire, ësema'pë.

¹⁰ Jaiye tiñe pa'ye Maija'quë isiye de'o co'amaña de'oyerepa necaicohua'i sête paí ñape yecohua'ire necaijë'ë, mësaru isi cuañose'eje pa'ye.

¹¹ Mësaru joyopi cocare caquë pani Maija'quë coca cayeje pa'ye cajuquë, cui'ne yecohua'ini cõcaiquë pani Maija'quë isi tutupi cõcaijaquë. Jaje pa'ina, si'aye mësaru nerojaiñe cato Jesucristo do'ija'a, Maija'quëre sihuajë de'oquëre pa'ni ca ja'ñere neñe pa'ijaquë. Maija'quëre cato si'a miañe jare i tses'e a'ë, cui'ne si'a co'amaña jare i tses'e a'ë, je'nëna. Jaje pa'ijaquë.

Cristore Tuicohua'i Ai Yo'oye

¹² Yë'ë oicohua'i, toa ëoyeje pa'ye jëaye neñañepi mësaruna títaja'coa. Títacona, me neni jaje tiñerepa pa'iquë'ni cuasama'pë pa'ijë'ë.

¹³ Neñañepi pa'ito coa ai jerepa sihuajë'ë, Cristo ai yo'ose'e ayere mësaruje pajë cajë, si'aye i ayere de'oyerepa mësaruja'a iñoquëna, ai sihuaja'cohua'ipi.

¹⁴ Jaje pa'ina, yecohua'ipi Cristore tui do'ire mësarute co'acohua'i a'ë cato mësaru sihuacohua'i pa'iye pa'iji, Maija'quë de'o joyopi mësaru ja're pa'i do'ire.

¹⁵ Paíre huani jëoñere, co'amaña yahue iñere, co'aye yo'oyere, yecohua'i yo'oyere coa cacarõjaijë ne de'huacaiyere yo'oye peoji, iyere yo'o do'ire ai yo'oquë pani huajëya' ju'iñe pa'iji.

16 Jaje pa'iquëta'are Cristore tui do'ire ai yo'oquë pani huajëya' ju'iñe peoji. Coa ai jerepa Maija'quëni de'oquëre pa'ni caquë sihuaye pa'iji, ai yo'o do'ire.

17 Tsoe t̄i'api, Maija'quë tsëcapëre pani iohua'i yo'ose'e ñaquë saï de'hua maca. Jaje mai yo'ose'ere du'ru ñaquë saï de'huaye huëoto, ¿merepa jaohua'i Maija'quë caye sehuoma'cohua'i yo'o cuañoja'cohua'i a'ni, ai co'acohua'i cui'ne Maija'quë cuañeñe yo'oma'pë tayocohua'i?

18 Nuñe yo'ocohua'ita'a huaso cuañoñe ai yo'oye pa'iji. Jaje pa'ito, ¿merepa co'aye yo'ocohua'i cui'ne tayocohua'i jëa t̄i'aja'cohua'i a'ni?

19 Jaje pa'ina, Maija'quë yëyepi yo'ojë ai yo'ocohua'i cato jare de'oyere yo'ojë pa'iye pa'iji, joñoase'ere Maija'quëna isini pa'ijë, Maija'quë cato maire ne de'huaquëpi, cui'ne i case'eje yo'o t̄i'acquëpi.

5

Sehuosicohua'ire Yëhuoye

1 Yë'ëje sehuosicohua'i ëjaë'ë. Jaje pa'ipi Jesucristo ai yo'oquëna, ñasiquëpi yure yëhuoyë, sehuosicohua'i ëjaohua'ire, mësarü quëro pa'icohua'ire, yë'ëje iohua'i ja're conï Jesús aye de'oyere pare jeteyo'je paja'quëpi.

2 Mësarupi ñacaija'cohua'i a'ë caquë Maija'quë mësaruna isisicohua'i de'oye cuasajë yo'ojë'ë, Maija'quë yëyeje pa'ye. Yo'oma'pë pa'ijë'ë, cuañe nëosi do'ire panita'a curiquëre ai yë do'ipi mësarü yë do'ire sihuajë nejë'ë, co'amaña.

3 Cui'ne mäsaru tsecohua'i a'ë cuasama'pë pa'ijë'ë, mäsaru ñajë pacohua'ire. Coa ai jerepa iohua'ini de'oye pani iñojë'ë, mäsaru pa'iyere ñajë tuija'cohua'ire.

4 Jaje mäsaru yo'onita'a yëi ñamare ñacaicohua'i Ëjaërepa dai maca de'o marore pare isi cuañoja'cohua'i a'ë, ti me'me tomema'coni, cui'ne i ayere de'oyere pare iñoja'coni.

5 Jaje cui'ne mäsaruje posëohua'ije sehuosicohua'i ëjaohua'i cayere de'oye sehuocohua'i pa'ijë'ë. Si'aohua'i pai ñape yecohua'ire de'oye sehuocaijë dahuëre pa'ijë'ë. Jaje pa'iyë pacohua'ire cato Diusupi sañope yo'oquë api, jerepa pa'iohua'i a'ë cuasacohua'ire. Jaje pa'iquëta'are dahuëre pa'icohua'ire cato de'oye yo'oquë i oiyepi coçaiquë api.

6 Jaje pa'iyë sëte Maija'quë tutu quë'i Ëjaëre pa'ë cuasajë i cuañeñere sehuojë dahuëre pa'ijë'ë, ipi mäsarute jerepa tëto saisicohua'ire neja'quëre iti yo'o maca ti'aëna.

7 Jaje pa'ina, si'aye mäsaru co'a ju'iñe Maija'quëna isijë'ë, mäsarute oi ñacaiquëna.

8 Ñare pajë pa'ijë'ë, sëtasicohua'ipi. Mäsarute sañope yo'oquë huati, jai yaije pa'ipi të'ijai mäsarute co'equë cu'iji, asi'i caquë.

9 Sañope ite quëco saojë'ë, Maija'quë pa'iji nuñerepa cuasayepi. Si'a hue'ña Maija'quë do'ijë pa'icohua'ije cui'ne ai yo'oye pa'iquëta'are quëcoyë cuasajë mäsaruje quëcojë'ë.

10 Jaje coa nëhui tëcahuë ai yo'osi jeteyo'je Diusupi mäsarute de'ocohua'ire nuñerepa pa'iohua'ire tutu quë'iohua'ire, cui'ne

tì'aja'cohua'ire pa'ë asacohua'ire nesipi, maire ai oi Jesucristo ja're tsioni pa'ijë ti carajai ma'ñere de'oyere pare pajajë caquë soisiquëpi.

¹¹ Jaë api, jerepa pa'i de'oquërepa ti carajaima'quërepa. Jaje pa'ijaquë.

Pëpa Tëjyerepa

¹² Maija'quë do'iquë nuñe pa'iquë Silvanona toya cuañohuë, iye nëhui coca maña. Iye toyase'e cato mësarute yëhuoye a'ë, cui'ne care paye a'ë, Maija'quë maire oi coa isise'ere. Jaje pa'ito ocue pa'i macarepa itire tuijë pa'ijë'ë.

¹³ Babilonia sehuosicohua'i pa'icohua'ipi mësarute pëpa saoyë, mësarute soise'eje pa'ye Diosu soisicohua'ipi, cui'ne y'ë mamaquëje pa'i Marcosje mësarute pëpa saoji.

¹⁴ Pai ñape yecohua'ire yo'jeire oiyepi oijë su'cuajë sihuajë pëpacajë'ë.

Si'ahua'i Jesucristore pacacaicohua'i sëte, ipi ñacaina, jo'cua de'oye pa'ijë'ë. Jaje pa'ijaquë.

Maija'quë Huajë Ca Nëose'e
New Testament in Secoya (EC:sey:Secoya)

copyright © 2012 Wycliffe Bible Translators, Inc.

Language: Secoya

Translation by: Wycliffe Bible Translators, Inc.

Secoya [sey], Ecuador

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Secoya

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

995e68c5-fe57-54e6-bf8e-0637526d3f7d